

吳文節公遺集

第五冊



吳文節公遺集卷十三

男養原謹編

奏議

覆奏銀錢畫一章程

奏為道

旨核議覆

奏事竊

臣

接准戶部咨奉

上諭穆彰阿等奏遵旨會議御史劉良駒條奏銀錢畫
一章程一摺銀錢並重本係制用幣經果能隨時酌核
不使輕重相懸裕國便民兩有裨益未可輒稱窒礙不
思設法變通著該督撫等各就地方情形詳細體察悉

心妥議具奏務使法立可以推行不致滋弊毋得任聽屬員巧為推諉稍存畏難苟安之見僅以一奏塞責欽此抄錄原奏咨行到臣伏思近年以來銀價日昂錢無底止自湏急圖挽救誠如

聖諭未可輒稱窒礙不思設法變通是以臣於道光二十四年間卽思用錢代銀挽積重而裕財用奏請將各省一切留支款項收錢放錢以冀漸平銀價嗣經部議以各省留支之款出納總在一年銀非久貯錢亦卽流布民間恐於見多見少之意未必有效請先令江西試行臣因細加体察留支之款收錢用錢旋納旋出寬屬效難驟期且一省試行鄰省市儉販錢而來適足以昂

銀價瀆經奏明毋庸試行在案茲准部咨議將各省留
支並司庫每年留用之項由各該督撫悉心詳核分別
收錢放錢並參酌前規以錢一千五百文准銀一兩奏
奉

諭旨著各就地方情形詳細體察妥議具奏目思設法
變通欲使銀錢並重非先籌收錢不可而收錢之數必
準乎放錢之數各省惟留支之項可以放錢而留支之
項惟各營兵餉為大宗次則文武官養廉查兵餉為兵
丁口食之需江西現在各兵支領餉銀一兩市價可易
錢一千九百餘文若以一千五百文准銀一兩放給折
耗甚多易滋藉口誠如部示應毋庸議至江西文武各

官養廉本有局鑄錢文搭放府道以上暨九江贛州二鎮上年又續請加搭捐輸錢文核計已在三四成以上亦難再行加搭祇可俟捐輸錢文搭放完竣再議按成易錢搭放此外則惟有州縣坐支之俸五役食等項數本不多江西北屬民間輸納錢糧大率多係以錢折納凡解司之項地方官不得不易銀批解而由縣坐支者既不需銀卽多係收錢放錢無可變更至於九江贛州兩關所收稅課皆係應行解部及聽候撥解鄰省并留支兵餉之用均未可以錢代收

臣職任封圻受

恩深重事關裕

國便民如能設法變通於事有裨斷不敢畏難苟安今

與藩司費開綬就江西現在情形悉心籌核留支項下
兵餉既未便輕議放錢無從變通而各州縣自行坐支
之俸三役食等款又本係收錢放錢若就此項議以變
通仍屬紙上空言無裨寔濟均毋庸議惟文武養廉現
雖搭錢成數較多遽難加搭將來捐輸錢文搭放完竣
則所搭僅止局錢為數已少自可酌分成數用錢搭放
容臣隨時酌量另行

奏明辦理所有臣悉心核議緣由理合據寔覆
奏伏乞

皇上聖鑒訓示謹

奏道光二十六年六月十三日奏奉

硃批戶部知道欽此

請將贛州府改為調缺摺

奏為知府缺分繁要請援案改為由外揀調以期人地
得宜恭摺具

奏仰祈

聖鑒事竊照江西贛州府管理一廳八縣東界閩省南
接粵壤向為匪徒出沒之所兼之習俗獷悍健鬪之風
甲於通省是以從前定為衝繁疲難四字相兼要缺請
旨簡放道光六年經前護撫臣嵩溥奏請由外揀員題
調奉

旨交前督

臣

琦善撫

臣

韓文綺

會議

經該

督等

以該

郡

出缺均蒙

特旨簡放其才自可理繁治劇或人地不甚相宜亦可據實陳明請

旨定奪請毋庸更改奉

旨允准嗣於道光十年因新任知府何增元人地未宜

經前督臣蔣攸銛會同前撫臣吳光悅具奏欽奉

諭旨將何增元留省另補並以該缺素稱難治

特飭該督等詳悉籌商或於所屬各省知府內遴員調

補或於江西省候補知府內熟悉情形者補授經督臣

等遵選得試用知府汪云任會奏請補奉

旨准行是此缺難治之處久在

聖主洞鑒之中近來搶劫擄掠之案猶復層見迭出甚
有結連鄰省匪徒倚衆恃強肆出擾民每須該府親往
督捕查辦必得素悉民隱督率有方之員方可得力伏
思蒙

恩簡放人員才具自屬出色第地方寔為繁要情形驟
難知悉若非在兩年久駕輕就熟之員則措施一或失
當卽於地方難資整頓因查各省知府請

旨之缺由外奏改題缺欽奉

特旨允准者有江蘇之淮安徐州兩府及河南之南陽
府山東之曹州府其奏改題缺奉部議駁止准照省會
首府之例改為調缺者有福建之泉州府廣東之潮州

府歷稽成案凡知府請

旨之缺卽不得仰邀

特旨遠改題缺亦經屢奉部議准改調缺今贛州府雖
非海疆以地方情形而論處處與閩粵接壤匪徒出沒
靡常寔非尋常腹地可比合無仰懇

天恩准將贛州府員缺照省會首府之例改為調缺其
所遺之缺仍請

旨簡放以符定制如此量為變通庶要缺可期得人而
額缺仍無窒碍現在贛州府知府何維墀丁憂業經

吳文鑑照例

題請開缺請

旨簡放如蒙

俞允所有贛州府一缺卽改由_臣等於通省知府內遴員
奏請調補其所遺之缺卽以

簡放之員請補據藩臬兩司會詳請

奏前來謹合詞恭摺具

奏伏乞

皇上聖鑒訓示謹

奏道光二十六年八月初五日奏奉

硃批另有旨欽此

覆奏訪查邪匪片

再_臣前准軍機大臣密寄道光二十六年六月十六日

奉

上諭御史蘇學健奏訪聞不法匪徒術誑幼孩一摺據稱此等匪徒起於浙江沿及江蘇等處於路上拋置食物並於果餅鋪內售賣食物時暗中更換小兒食之卽斃斃后蓄取腦腎心肝流傳漸廣等語果如該御史所奏邪匪為害地方關係匪淺著各按摺內所指情形選派員弁嚴密訪查務期有犯必獲並訊明此術起自何人意欲何為按律懲辦以除奸慝而衛民生等因欽此嗣又接准軍機大臣字寄七月二十四日奉上諭前有人奏近多匪徒迷毒幼孩一案當有旨令各該督撫訪屬嚴等究辦矣朕思此等匪徒行踪詭秘到

官熬審受刑何肯供吐寃情倘承審官畏難遷就且為
規避處分起見勢將使匪徒等倖逃法網著各該督撫
務卽督飭所屬於獲到案之犯悉心研鞫不得怠存
消弭化大為小以祛邪惡而靖地方等因欽此伏查
於閏五月間風聞民間相傳有邪匪以藥術迷惑害幼孩
之說當以所言雖荒渺無據未可輕信但事屬殘害民
生若果寔有此等邪匪斷不可不行拏究卽經密飭各
地方官嚴密訪緝務將有犯必獲仍不得稍涉張惶驚
惑民心嗣兩次欽奉

諭旨復經欽遵諄飭各屬嚴密訪查去後頃據各屬稟
覆均查無前項匪徒毒害之事並據臨川萬年鄱陽星

子清汪安福等縣稟報據鄉民獲送形跡可疑之黃連
興黃紹義何魁群謝輝九龔鳳吉劉廉氏等亦皆訊係
賣藥貿易之人並無為匪不法內龔鳳吉劉廉氏等二
起因其供涉疑似復經臣提省委員復審根究來歷住
址均屬明白並有原籍鄰族地保指證寔非邪匪均經
分別取保開釋現在浮言漸息臣仍飭屬鎮靜訪察勿
因事無寔據致涉大意亦不得稍事張惶致滋波累以
仰副

聖主除害安良至意所有汪西境內現在查無前項邪
匪及辦理緣由臣謹附片覆

奏伏乞

聖鑒謹

奏道光二十六年九月二十一日奏奉

硃批知道了欽此

籌補缺漕摺

奏為遵

旨籌補緩缺漕糧分別起解搭運緣由恭摺

奏祈

聖鑒事竊臣接准戶部咨以江浙等省徵收漕糧雖上屆三年內有兩年全漕起運與江浙等省歲有短少不同惟本年起運數目究係比較上屆三年均屬有減無增奏請

勅下迅卽設法補運等因奉

旨依議欽此欽遵轉行遵照去後茲據督糧道朱履會同藩司費開綬署監法道劉熾昌籌議詳請具

奏前來臣查江西省本年起運道光二十六年正副漕米比較二十三二十五全運之年固屬短少卽比較二十四年分漕糧亦少運米六萬餘石緣上年夏秋缺雨收成歉薄經臣委員勘寔奏懇

恩施緩徵今准部咨行令設法補運自應遵照辦理臣與司道等再四熟籌現在江西地方因上年受旱較廣糧價已昂若動項採買深恐有妨民食且司庫亦多支絀動碾常平倉穀亦恐買補稽延有闕儲備查各官捐

輸米石先經且廣為勸諭現已據陸續報捐米一萬餘石業經派幫帶運因思出運軍船各丁應得食米向有贏餘除去貧疲船丁外計每船仍可收買二三十石約可收買米一萬石於各丁口食尚有數餘惟查收買軍船七成扣半等米每石例給價銀一两九錢現在江浙市價增昂若照案核給該丁等未免偏枯應請每石酌加一錢給銀二兩免其扣平亦毋須另給水脚較之採買市米另加運費者所省寔多卽經飭據藩司籌動庫銀二萬兩移交糧道按數收買仍交各船帶運飭造冊結詳咨以上二項共可得米二萬餘石然為數尚屬無多復查得鹽道所管鹽義倉穀本係且衙門裁革鹽規

充公項下奏明今年動支買穀存貯各府現計共存穀
十二萬餘石除南贛兩府地方緊要仍須酌留外其餘
可動碾穀八萬石計可得米四萬石以資補運將來無
庸動司庫之項買還既可節省

帑金而於本省民食倉儲仍無妨碍惟各幫軍船現已
陸續開行勢難截留灑帶其減敲軍船既修船需時而
舵水等久已星散亦驟難招集恐誤跟幫渡黃之期應
卽另籌起運查江蘇省現在推廣捐米事例籌辦海運
此項米解往搭運事屬便易現已飭令鹽道飛飭各府
將鹽義倉穀核數動碾另由臣遴委妥員分投雇募民
船押運赴蘇解交上海道驗收兌給海船搭運其由西

運蘇水脚卽按照程站給發至海運脚價應俟蘇省核定知照後由汪西籌款解往將來卽與收買旗丁米價一併作正開銷除分飭各司道遵照並咨高汪蘇督換臣檄飭上海道預為雇募商船俟西省米石解到卽可兌交搭運北上外所有設法籌補米石及分別起解搭運緣由理合恭摺具

奏伏乞

皇上聖鑒訓示謹

奏道光二十七年二月十五日奏奉

硃批戶部知道欽此

籌補京倉米石改由糧船灑帶摺

奏為籌補京倉米石不敷原奏之數並改由糧船灑帶
北上以歸簡便而節費用恭摺

奏祈

聖鑒事竊照江西省起運新漕比較上三屆有減無增

經臣遵

旨籌補除各官捐輸及收買幫丁餘米共二萬餘石派
幫搭運外擬再動碾益義倉穀八萬石計可得米四萬
石因各幫軍船業已陸續開行請運赴江蘇上海另雇
海船先運北上緣由當經

奏奉

硃批戶部知道欽此查先據南康九江二府暨南昌新

建二縣稟報將存貯鹽義倉穀儘數動碾共得米三萬
三千石其南贛二府倉穀本拟各酌碾數千石湊用適
自二月下旬以來久晴不雨早秧尚未插齊糧價日增
臣酌核目前情形南贛地方緊要未敢拘泥原奏致缺
儲備是以只就現報米數飭令起運所有較原奏少米
七千石係因時酌量存留南贛倉穀未經動碾至海運
章程現在尚未准江蘇督撫臣咨照而本省糧船因前
值雨少灘多節節磨淺甫報渡湖尚未出境若將此項
米石雇船趕赴江蘇儀徵縣老虎頸一帶地方乘糧船
起卸幫木暫泊之時卽行兌交搭運赴通甚為簡便當
經飭據糧道查稟本年起運軍船五百十五隻以三萬

三千石米核計每船約加裝米六十餘石尚不致形笨
重惟幫丁將米過關起剝費用在所不免應請每石酌
給耗米折銀二錢水脚銀三錢五分庶免幫丁藉口賠
累致有貽誤臣查係寔在情形且較之另雇海船搭運
者所省已多臣現已飭令藩司分起委員將前項米石
裝運趕赴下游交糧船帶運北上並酌動庫項將脚耗
發給事竣核寔報銷除咨明江蘇督撫臣漕運總督倉
場侍郎暨戶部查照外所有起運米石不敷原奏之數
並改由糧船搭運緣由理合恭摺具
奏伏乞

皇上聖鑒再各處榷米均經臣抽調查驗一律乾潔惟

各倉貯穀久暫不等顏色未能畫一合並陳明謹
奏道光二十七年三月二十七日奏奉

硃批戶部知道欽此

吳文節公遺集卷十四

男養原謹編

奏議

覆奏嚴禁幫倉浮費摺

奏為遵

旨覆奏仰祈

聖鑒事竊臣先後接准戶部咨議覆御史朱昌頤條奏漕務積弊一摺請將幫弁及地方諸費

勅下有漕各督撫按照各該處現時費用款目銀數一體嚴查悉心酌核妥議章程請

旨定奪又議覆給事中雷以誠奏請飭有漕各省查照

山東裁減旗丁津貼公項之案一律辦理一摺以各省情形不一津貼多寡有差應由各該督撫通盤籌畫不必拘定十分之三致滋窒礙等因奏奉

諭旨依議欽此均經恭錄轉行欽遵去後茲據督糧道朱履會同布政司費開綬以查無前項諸弊詳請覆

奏前來臣查江西省有漕五十廳州縣起運正副米七十六萬有奇糧額較輕津貼亦少非如蘇浙之賦重費多者可比且運道既遠丁力又疲亦與山東之丁般路近者不同前因州縣浮收旗丁勒索曾於嘉慶四年及十四十五等年迭次

奏明將旗丁所得所用各項陋規十五款分別裁革飭

禁載入漕運則例永遠遵行在案近年復嚴切查禁並
無雜事加增之處旗丁既無多索官民亦屬相安其中
間有鬧漕之案多係地棍刁徒藉詞斂錢肥己百姓或
愚而為其所脅地方官或措置失宜果能經理得人隨
案懲辦自可仍循舊轍並非浮徵病民致釀事端也今
若將幫丁及地方不得已諸費明列款目議立章程請
旨定奪是以本非例給之銀並無額定之項一一懸為
令甲不特事多窒碍抑且跡類加徵在昔申明例禁猶
慮不肖之貪暗中需索今若明定章程更恐有所影射
例外浮加臣就汪五情形再四籌思與其紛更而事有
未便不若循舊而察核加嚴惟有嚴飭所屬凜持

功令遵循舊章旗丁則責成糧道不准格外絲毫多索
地方官則責成司道暨各知府隨時查察不准格外絲
毫多收以期上下相安漕運無誤至江西間遇水旱偏
災均經委員確勘

奏請展緩非因州縣規避交糧費重捏報災歎此後仍
當加意慎重倘有捏災請緩等弊亦即從嚴叅辦仰副
聖主肅清漕政之至意所有漕務現時費用欸目毋庸
明立章程緣由理合恭摺
奏伏乞

皇上聖鑒訓示謹

奏道光二十七年四月二十日奏奉

殊批另有旨欽此

拏獲崇義長寧二縣匪犯摺

奏為江西崇義長寧二縣先後拏獲教犯會匪多名現在提省究辦地方均極安謐先將獲犯大概情形恭摺奏祈

聖鑒事竊查江西南安府所屬地方多與湖南廣東連界贛州府所屬地方則多接壤廣東福建每有習教拜會情事歷經查辦在案臣恐該匪等萌孽潛滋與藩臬兩司不時嚴飭各屬認真訪察以期有案必破有犯必懲茲據南安府暨崇義縣稟稱先經該縣營訪聞境內與湖南桂陽縣交界地方有吃齋習教之人選派兵役

嚴密緝拏卽據捕獲楚潮泗等二十餘名並起獲經簿等件訊據楚潮泗供認拜湖南人王成金為師習三乘教傳徒歛錢並無別項不法嗣經南安府親往督拏續獲廖文華等十餘名供情約略相同亦有只認吃齋者查閱經簿尚無違悖字樣此崇義縣拏獲教犯之大略也又據贛州道府稟稱據長寧縣稟先經訪聞境內各堡多有匪徒結盟拜會並有外來齋匪假託相面占課之術形跡可疑正在會營掩捕聞於五月二十九日傳聞匪徒有聚眾劫搶之信卽經會同城守營把總分撥兵役前往查探於五里亭盤獲身帶短刀之謝詞華一犯將其押解進城訊隨後卽有百數十人各執刀械蜂

擁追至意欲入城經把總德全開放烏鎗當時擊斃一
匪餘匪亦卽紛紛逃散因該縣汛守兵數無多恐不敷
查拏稟請添撥等情該道李本仁據稟報卽商同南
贛鎮臣德坤檄飭游擊穆克登布酌帶標兵會同贛州
府知府周玉衡星夜馳往搜捕臣接稟後復飭該道親
往督辦嗣據該道府等稟稱先後馳抵該縣沿途察看
居民並無被搶之家詢據官民僉稱匪徒自逃散後並
未復至卽經會督營縣陸續獲犯凌成濬等六十餘名
訊據供稱伊等向結有闕爺會不拘人數隨時結拜亦
有年少居首者五月間聞有外來齋公董言台羅晉章
到在逃之謝詞封家往來旋經謝詞封並在逃之潘蛇

羅四來約小的們劫搶因謝詞華被獲是以來城希圖
奪犯不料被官人擊斃一人均各逃散等語現在該道
業已旋署酌留兵丁數十名飭令贛州府在彼督率搜
緝逸匪餘均散回隸伍此長寧縣拏獲會匪之大略也
臣查齋匪會匪名目雖異均足為人心風俗之害崇義
案犯既有習教傳徒之事所供僅止圖歛錢文已難憑
信而長寧案犯胆敢糾眾圖劫則其平日結盟拜會更
難保別無不法之事現供顯有狡飾所有案內首要各
犯必須分別嚴緝按名就擒提同研究確情核寔懲辦
方足以儆邪慝而靖閭閻臣已將楚潮泗等供出之湖
南各犯飛咨湖南撫臣一體飭屬嚴拏並將謝詞封等

首要各犯通行嚴飭各屬派委員弁改裝購線於本境鄰界接緝偵緝務期悉數弋獲勿使一名漏網以仰副聖主除莠安良之至意除將已獲各犯先行提省督司嚴審是否尚有執重情另行分別究辦外所有崇義長亭二縣查拏教犯會匪大概情形及地方安謐緣由謹繕摺具

奏伏乞

皇上聖鑒謹

奏道光二十七年八月初四日奏奉

硃批所辦好另有旨欽此

審辦長義縣會匪摺

奏為匪徒結盟拜會糾眾圍劫提省審明按例定擬恭摺

奏祈

聖鑒事竊臣前據贛州道府稟報會營拏獲長寧縣匪犯凌成滌等究出與逸犯謝詞封等結拜閔爺會糾眾搶劫因夥犯謝詞華被獲欵行入城奪犯等情當經嚴札飭拏首夥各逸犯務獲一面飭將已獲各犯解省審辦一面先將現辦大概情形與崇義縣訪獲另案教匪楚潮泗等一案恭摺具奏於道光二十七年九月十四日奉到

硃批所辦好另有旨欽此同日又准軍機大臣字寄道

光二十七年八月二十四日奉

上諭吳文鎔奏擧獲教匪會匪提省審辦一摺所辦好
江西南安贛州兩府地方界連湖南廣東福建每有匪
徒潛教拜會傳徒等事甚或糾眾圍劫為害地方更難
保無另有不軌重情必應嚴密擒拿澈底根究以期淨
絕根株方無貽患著該撫督同臬司先將現獲各犯嚴
行訊辦該犯楚潮泗等供止吃齋歛錢斷難憑信所供
拜湖南人王成金為師習教並謝詞華等結盟拜會胆
敢聚眾希圖辱犯尤屬不法已極務卽飛咨湖南一體
飭屬嚴拏研究確情覈寔懲辦至已獲案人犯必應多
方詳鞫毋令任意狡飾致有不寘不盡在逃各逸犯著

節通飭各屬並令會鄰封毋分畛域一体嚴密搜拏務期悉數就獲不留餘孽是為至要將此諭令知之欽此等因遵

旨寄信前來查畜犯謝詞封從犯僧道祥等業經該管道府督飭各該縣兵役先後弋獲陸續解省經臣督同陞任臬司溫子吳發委南昌府審辦茲據署南昌府知府蔣啟敷以首犯謝詞封及涂升凌祥賢趙拔富潘啟連潘汶佳范開礼黃潮沈僧海渡等九名均已在監在途病故將凌成濛等八十四犯嚴審明確按例議擬由新任臬司陸元煊審解到臣聲明楚朝泗等習教傳徒一案現在嚴究確情容俟審定後另案辦理經臣親提

研鞫緣謝詞封籍隸長寧縣與現獲之凌成滌僧道禪
已被擊斃之易泳盛在逃之董言台素識交好董言台
不知葷酒稱為齋公道光二十七年正月不記日期凌
成滌僧道禪易泳盛前赴謝詞封家探望謝詞封談及
贛州一帶向有天地會名目同會中人彼此幫扶可以
免人欺侮結夥訛詐可以得賊分用起意令凌成滌等
各為糾人訂期結拜並因天地會歷奉拏辦恐致張揚
敗露遂改為闕爺會以罔掩飾凌成滌等允從遂分投
糾得已獲之謝球生保王得珍林遇椿潘發邱繼淙凌
得滌胡雲芳謝名貴胡朋貴潘貓公三謝詞華獲案病
故之涂升凌祥賢趙拔富潘啟連潘汶佳危開禮黃潮

沈僧海渡在逃之潘蛇羅四劉良老五湯石金妹潘蛇
羅二羅晉章等二十四人訂於是月二十六日赴謝詞
封家會齊至日凌成滌等與謝球生保等畢集謝詞封
用紅紙寫立闕爺牌位又做成布旂五面每面上寫忠
義堂三字插入米斗之中買備香燭雞酒供奉謝詞封
開寫八會人姓名已畢與凌成滌等同向神牌跪拜不
序年齒自居為總老大令凌成滌僧道禪易泳盛各為
散老大其餘依齒序列謝詞封站立上首口念有忠有
義毋得欺兄騙弟如有欺騙立見消亡又此後總散老
大有事呼喚凡我同會不許不至等誓語誓畢宰雞取
血滴酒同飲並約以同會中人各以髮辮左盤為記謝

球生保等聽受給與謝詞封錢或一百文或二百文而
散以上現獲之謝球生保等及在逃之潘蛇羅四等二
十四犯平日均游蕩為匪素非善類是年五月間謝詞
封因會党不多難於助勢復囑凌成滌僧道祥易泳盛
廣為糾約凌成滌等又先後誘允已獲之曹二酉范發
賴胡得盛潘幅堂凌三陽林沅羅宣李善壽唐喜彝王
滿謝詞仁湯爛眼五胡李保謝過命猪李沾沅李含秀
潘二美胡慶祖謝開彝華汶慶曹鍋水桶張老四陳邊
三范成龍凌開滌凌運温李瑞成湯運庭胡開明潘其
漢楊丕四潘步賢劉亮何鍾傳萬凌連滌潘廣二謝名
受麥作玉潘鴉鵲賴作滌李瑞庭凌汶發凌開埽五凌

良發凌貓七謝老三彭耀先湯接華王得坤湯得能王
振升方書潤王陰欄猪胡觀音保涂連開潘賤九凌瑞
松邱幅賢潘啟西劉椿香王亞三彭舉長何祿古凌爛
眼潘永必五湯得喜潘啟富李益成趙拔盛胡成幅潘
汶良獲案病故之雷祖滌等七十二人於是月十四日
在謝詞封家相近之仙娘空廟照依前式結拜謝詞封
凌成滌僧道禪易永盛仍自居為總散老大其餘依蓋
序列曹二百等各給謝詞封錢或一百文或數十文不
等以止曹二百等七十二犯均係鄉愚無知平日並無
為匪情事二十七年五月二十七日謝詞封因會夥眾
多起意搶劫並因長寧城外貧戶居多致行入城肆搶

正與凌成滌僧道禪易泳盛在家商議適董言台走至
聽聞詢悉前情從旁慫恿並稱伊當糾人人夥與謝詞
封等約定日期而去此後董言台並未復至亦無被糾
入夥之人是月二十九日謝詞封傳集會衆告以入城
搶劫情由謝球生保等當未允許因被謝詞封用言嚇
逼無奈允從謝詞封先令謝詞華身藏短刀往探城內
有無準備自與凌成滌僧道禪易泳盛率領謝球生保
等各帶刀械分起潛進而謝詞華行抵城外五里亭地
方正值該縣先期訪聞會營督帶兵役出城查拏將謝
詞華盤獲押送進城謝詞封聞知喝眾追趕甫至城邊
河岸曹二酉等畏罪陸續逃散凌成滌僧道禪易泳盛

謝球生保王得珍林遇椿潘發邱繼淙凌得滌胡雲芳
謝名貴胡朋貴潘貓公三涂升凌祥賢趙拔富潘啟連
潘汶佳范開禮黃潮沈僧海渡潘蛇羅四劉良老五湯
召金妹潘蛇羅二羅普章各執刀械隨同謝詞封款行
入城將謝詞華奪回該縣把總德全見勢兇猛放槍抵
禦中傷易泳盛身死謝詞封等始各畏懼逃逸該縣因
長寧汛守兵數無多不敷查掣稟經該道李本仁商同
南贛鎮臣德坤檄飭游擊穆克登布酌帶標兵會同贛
州府知府周玉衡馳往搜捕並經臣札飭該道親往督
辦詞據陸續報獲凌成滌等六十餘犯訊取大略供情

具稟經臣一面奏

聞一面飭令嚴拏解審續據獲到首犯謝調封等並前
獲之凌成滌等先後押解來省督司發委審辦茲據訊
擬由司審轉前來且恐該犯等所供並無謀為不軌重
情顯係任意狡飾且恐所糾黨羽尚不止此數再四究
詰並加以刑嚇各犯堅執如前委無另犯不法別案及
更有聽從入會之人案無遁飾查例載聞粵等省不法
匪徒潛謀糾結浪興天地會名目搶劫拒捕者首犯與
曾經糾人之犯俱擬斬立決其並未轉糾黨羽或聽誘
被脇素非良善者俱擬絞立決如平日並無為匪僅止
一時隨同入會者俱發遣新疆酌撥種地當差等語此
案謝詞封因贛州一帶先有天地會名目輒敢起意糾

人結拜因天地會屢奉拏辦另立會名希圖掩飾該犯聚至百人之多不序年齒自為總老大又復起意入城罔劫及至先往探信之謝詞華被獲猶敢率眾進城奪犯寔屬目無法紀凌成濬僧道禪易泳盛先為謝詞封糾誘多人入會結拜繼復聽從入城罔劫並墮同奪犯寔屬同惡共濟雖罔劫未成而事屬已行難容寬貸自應按例問擬謝詞封凌成濬僧道禪易泳盛四犯均合依閩粵等省不法匪徒復興天地會名目搶劫拒捕者首犯與曾經糾人之犯俱擬斬立決例擬斬立決謝詞封聚眾百人起意入城行劫應從重加擬梟示已於取供後在監病故照例戮屍傳首犯事地方懸竿示眾易

泳盛已被擊斃應毋庸議謝球生保等聽糾入會隨同
圍劫奪犯未成訊明平日或犯搶竊或犯訛詐均非良
善亦應按例問擬謝球生保王得珍林遇椿潘發邱繼
淙凌得滌胡雲芳謝名貴胡朋貴潘貓公三謝詞華涂
升凌祥賢趙振富潘啟連潘汶佳范開禮黃潮沈僧海
渡十九犯均合依並未轉糾党羽或聽誘被脇素非良
善者俱擬絞立決例擬絞立決涂升凌祥賢趙振富潘
啟連潘汶佳范開禮黃潮沈僧海渡業已在監在途病
故均毋庸議曹二酉等僅止被誘入會其脇從行劫中
途逃散尚知畏法且平日並無為匪情事亦應按例問
擬曹二酉范發賴胡得盛潘幅堂凌三陽林沅羅宣李

善壽唐喜彝王滿謝詞仁湯爛眼五胡李保謝過命猪
李沾沅李合秀潘二美胡慶祖謝開彝華汶慶曹鍋水
桶張老四陳邊三范成龍凌開滌凌連温李瑞成湯運
庭胡開明潘其溪楊丕四潘步賢劉亮何鍾傳萬凌連
滌潘廣二謝名受凌作玉潘鴉鵲賴作滌李瑞庭凌汶
發凌開掃五凌良發凌貓七謝老三彭耀先湯接華王
得坤湯得龍王振升方書潤王陰欄猪胡觀音保涂連
開潘賤九凌瑞松邱幅賢潘啟西劉椿香王丕三彭舉
長何祿古凌爛眼潘禾必五湯得喜潘啟富李益成趙
拔盛胡成幅潘汶良雷祖滌七十二犯均合依平日並
無為匪供止一時隨同入會者俱發遣新疆酌撥種地

當差例俱發遣新疆酌撥種地當差雷祖滌業已在途
病故應毋庸議以上各犯內有供稱親老丁單者係屬
會匪毋庸查辦留養有弟兄同犯者亦不作一家共犯
論謝詞封所書神牌名單及所製布旂訊已燒燬請免
追起其所得各犯錢文身死勿徵謝詞封屍棺交保看
守餘犯屍棺分別飭關屍屬領埋謝詞封等在監在途
病故刑禁解役人等訊無凌虐情弊應毋庸議各該犯
均係帶病進監身故管獄官例無處分逸犯潘蛇羅四
等飭緝獲日另結再此案結盟拜會匪犯係各該營縣
訪聞拏獲究辦所有失察職名邀免開叅除將崇義縣
教匪楚潮泗等一案俟審定後容臣另行擬辦並將此

案全案供招送部外所有審擬緣由理合恭摺具

奏伏乞

皇上聖鑒勅部核議施行謹

奏道光二十七年十月二十五日奏奉

硃批刑部速議具奏欽此

拏獲湖南匪犯

再臣接准軍機大臣字寄道光二十七年九月初九日

奉

上諭本 據裕泰陸費琛奏湖南臨武甯二縣訪獲

糾眾拜會首從各犯一摺又片奏桂陽縣拏獲教犯訊

出王存真等傳徒習教蹤跡飛咨廣東江兩一体飭拏

並接准江西來咨通飭嚴密偵捕等語此案臨武常寧
等縣營先後拏獲匪犯一百十餘名之多訊據供認結
盟拜會且刊刻字帖沿襲悖逆語句分途傳布必應嚴
密拏辦以淨根株者英吳文鎔等接奉此旨務卽按照
犯供並詳覈裕泰陸費琮咨文選派幹員前往各該處
密行查訪拏辦以懲邪匪而靖地方等因欽此欽遵查
得江西崇義縣訪獲齋匪楚潮泗等一案核與湖南桂
陽縣所獲齋匪廖宗箕等係屬一起卽經彼此知會嚴
拏党羽現在將各犯提省委員審訊一俟審得確情再
行按擬具奏其與湖南臨武常寧二縣匪犯唐幗通等
有無牽涉未准湖南撫臣移知當卽飛咨查詢卽准抄

錄原奏摺稿並聲明與江西之案無涉移咨到臣核
其犯供情節及徒党姓名與楚潮泗等所供並無牽涉
自係另屬一起但湖南與江西連界彼案逸犯難免不
聞等潛竄入境先經臣通飭各屬選派員弁嚴密堵拏
卽據吉南贛寧道李本仁飭據委員候補縣丞姚德普
在廬陵縣地方會同各縣營兵役將湖南案內首要之
黃壽松一犯拏獲解省委訊據供伊從前未到過江西
在家時曾收江西人董時詒為徒現因在湖南與張老
二蔣萬成等聚眾結盟地方官查拏嚴緊是以逃到江
西等語核與湖南原奏犯供大略相同查該犯在江西
既未有案無可審辦自應解往楚省躉案辦理除已飭

司委員將黃壽松一犯解交湖南隸案訊辦外仍一面
嚴飭各委員分赴各府縣務將在逃匪犯不分畛域一
體實力搜捕不使稍留餘孽以靖地方理合將先經拿
獲湖南要犯黃壽松及現在偵緝各逸匪緣由附片具
奏伏乞

聖鑒謹

奏道光二十七年十月二十五日奏奉
硃批知道了欽此

吳文節公遺集卷十五

男養原謹編

奏議

審辦崇義縣齋匪摺

奏為崇義縣匪徒習教傳徒斂錢惑眾遵

旨訊明定擬恭摺覆

奏仰祈

聖鑒事竊 臣前據南安府暨崇義縣稟報先後會同營

汛及各該地方文武拏獲齋匪楚潮泗等三十餘名究

出楚潮泗係拜湖南人王成金為師習學三乘教傳徒

斂錢等情當經委負前往搜捕並飛咨湖南撫 臣一體

吳三官公遺集
飭屢嚴拿在逃首從各犯務獲及飭將已獲各犯解省
審辦一面先將大概情形與長寧縣匪徒謝詞封等結
盟拜會糾眾圍劫一案恭摺具

奏於道光二十七年九月十四日奉到

硃批所辦好另有旨欵此同日又承准軍機大臣字寄
道光二十七年八月二十四日奉

上諭吳文鎔奏拿獲教匪會匪提省審辦一摺所辦好
汪西南安贛州地方界連湖南廣東福建每有匪徒習
教拜會傳徒等事甚或糾眾圍劫為害地方更難保無
另有不軌重情必應嚴密擒拿澈底根究著該撫督同
臬司先將現獲各犯嚴行訊辦該犯楚潮泗等供止吃

齋歛錢斷難憑信所供拜湖南人王成金為師習教務
卽飛咨湖南一體飭屬嚴拏懲辦至已獲案人犯必應
多方詳鞫毋令任意狡飾致有不寘不盡在逃各逸犯
著卽通飭各屬並咨會鄰封毋分畛域一体嚴密搜拏
務期悉數就獲不留餘孽是為至要將此諭令知之欽
此等因遵

旨寄信前來欽遵查得長寧縣匪徒謝詞封等一案業
經委貧審明經臣提訊議擬具

奏在案此案該犯楚潮泗等同續獲各犯先經該府縣陸

續解省經前司溫予吳發委南昌府等審辦茲據南
昌府知府吳清皋南昌府同知蔣啟敷以案內訊止被

誘吃齋並未入教之余榮和等十名赴縣自首改悔開
齋均經各該縣訊取族鄰供結保釋所有從犯張開點
鍾傳第李楨祥傅傳通鍾興芳鄒學先朱庚古張堂灝
沈盛標楚喻義李心本楚金題鄒雲隴等十三名先後
在途在押患病及帶病進監身故廩文華一名訊供另
拜湖南人徐旺珍為師習教與湖南桂陽縣等獲教犯
事有牽涉解赴楚省臬案審辦將楚潮泗等二十五犯
嚴審確情按例議擬由新任臬司陸元煊審解到臣臣
親提研鞫緣楚潮泗籍隸崇義縣先未為匪道光二十
七年正月間楚潮泗與其兄楚紹芳赴湖南貿易與在
逃之桂陽縣人王成金卽王存真會遇聞談王成金談

及習學三乘教可以獲福延年又可歛錢使用教內有
引恩證恩天恩子恩衆生等名目引恩戴用道冠道袍
傳授經卷證恩可以傳徒其餘天恩子恩衆主不遇始
素念經又有上中下三蓋經牌領得上蓋中蓋者亦可
傳徒伊係引恩如楚潮泗願習伊當傳授等語楚潮泗
聽信卽拜王成金為師王成金傳授口誦無生老母咒
語並三皈五戒派名證恩所謂三皈者皈佛皈法皈僧
五戒者一戒殺生二戒偷盜三戒邪淫四戒酒肉五戒
妄語並給與黃紬中蓋經牌一個經卷小書三本楚潮
泗勸令楚紹芳亦拜王成金為師派名子恩楚潮泗送
給王成金香錢二千文而散是年夏間楚潮泗聞知同

教之廉宗箕在湖南桂陽縣地方行教獲利亦起意傳
徒斂錢遂自称三乘教首將紅紙刷印上蓋中蓋下蓋
經牌多張先後誘允已獲之李家動彭卿標賴家興張
孟洸朱宏浪劉通沅朱帮瑞鄒學株余觀妹李灝宦解
楚審辦之廉文華在逃之劉化帮楚百荷胡善哉胡善
者十五人拜師入教李家動等各送香錢一二百文不
等楚潮泗每人各給紅紙下蓋經牌一張傳授口誦無
生老母咒語派名衆生鄒學株余觀妹李灝宦並未送
錢僅派衆生名目未經給牌傳咒其中劉通沅朱帮瑞
楚百荷胡善哉胡善者五人均係楚紹芳引進楚潮泗
又誘令余榮和吳懋標李鍾衡李正機彭卿塘鄧亦九

鄒繼華陳年太張克順胡宗連持齋邀福未經入教又
在逃之羅友書李思義胡宗圻李積五劉得彭朱步月
范普生七人亦習三乘教其拜何人為師無從詢寘羅
友書傳已獲之余濟禎余興聲並獲案病故之張開點
鍾傳第四人李思義傳已獲之楚學曾並獲案病故之
李禎祥傳傳通鍾興芳四人胡宗圻傳已獲之陳明遠
余榮梅並獲案病故之鄒學光三人李積五傳已獲之
劉萑旌劉萑沈並獲案病故之朱庚古張堂顯沈盛標
五人劉得彭傳已獲之鍾高興張新遠並獲案病故之
楚喻義李心本四人朱步月傳已獲之鄧翼來並獲案
病故之楚金題二人范普生傳已獲之張興隆一人各

令拜師入教派名衆生因未送錢均未得受經牌呪語
又已獲之鍾翠興楚潮注並獲竊病故之鄒雲隴三人
平日均因患病始素消災不知邪教名目經該縣府訪
聞查奪稟報經臣一面奏

聞一面委員前往搜捕先後弋獲楚潮泗等押解未省
發委審辦茲據訊擬由司審轉前來臣以該犯等所供
僅止習教傳徒歛錢惑衆並無另犯不軌重情殊難憑
信且恐所傳徒衆尚不止此數親提再四研鞫併加以
刑嚇該犯等堅執不移案無遁飾應卽議結查例載傳
習白陽等邪教習念荒誕不經呪語拜師傳徒惑衆者
為首擬絞立決為從年未逾六十及雖逾六十而有傳

徒情事俱改發回城給大小伯克及力能管束之回子
為奴等語此案楚潮泗先拜湖南人王成金為師入三
乘教習念經呪得受經牌經卷嗣聞同教康宗箕在楚
省行教獲利起意傳徒歛錢自稱教首先後誘令李家
動等十五人拜伊為師寔屬藐法自應按例問擬楚潮
泗一犯合依傳習白陽等邪教習念荒誕不經呪語拜
師傳徒惑眾者為首擬絞立決例擬絞立決楚紹芳等
聽從拜師入教習念呪語得受經牌即屬為從而楚紹
芳又引人入教亦與傳徒無異且均年未六十亦應按
例問擬楚紹芳李家動彭卿標賴家興張孟洸朱宏浪
劉通沅朱帮瑞八犯合依為從年未逾六十及雖逾六

十而有傳徒情事俱改發回城給大小伯克及力能管束之回子為奴例俱發回城給大小伯克及力能管束之回子為奴雖係南贛匪徒例應加等第罪至為奴無可復加應毋庸議鄒學株等聽從拜師入教派名衆生並未習念經呪亦未得受經牌與李家動等業經傳習者有聞自應酌減問擬鄒學株余觀妹李灝宦余濟楨余興馨楚學曾陳明遠余榮梅劉萑耀劉萑洸鍾高興張新遠鄧翼求張興隆張開點鍾傳弟李楨祥傳傳通鍾興芳鄒學先庚古張堂灝沈盛標楚俞義李心本楚金題二十六犯應請於李家動等為奴罪上酌減一等擬杖一百徒三年內劉萑耀劉萑洸二犯籍隸泰和

事犯南安餘俱南贛匪徒照例各於徒罪上加一等擬杖一百流二千里張開點鍾傳第李楨祥傳傳通鍾與芳鄔學先朱庚古張堂灝沈盛標楚喻義李心本楚金題業經病故應毋庸議餘俱發配分別折責安置以上各犯俱

赦不赦有供稱親老丁單者毋庸查辦留養有弟兄同犯者亦不作一家共犯論鍾翠興楚潮注並獲秦病故之鄒雲隴訊止茹素消災不知邪教名目例得免議余榮和吳懋標李鍾衡李正機彭卿塘鄧亦九鄒繼華陳年六張克順胡宗連先經被誘茹素旋即改悔赴縣呈首開齋業經各該縣訊明取具族鄰保結釋放毋庸再

議張開點等在途在押在監病故刑禁解役人等訊無
凌虐情弊亦毋庸議犯係帶病進監身故管獄官例無
處分楚潮泗得受香錢訊無確數免其著追廉文華因
與湖南掣獲教匪事有牽涉解隸質訊應隸彼案擬結
逸犯王成金等咨行嚴緝獲日另結再此案齋匪係該
縣府自行訪聞會營等獲究辦所有失察文武職名邀
免開送除將全案供招咨部起獲經牌書本等件咨送
軍機處備查外所有審擬緣由理合恭摺覆

奏伏乞

皇上聖鑒勅下法司核覆施行謹

奏道光二十七年十一月二十六日奏奉

殊批刑部速議具奏欽此

審辦續獲長寧縣會匪摺

奏為續獲長寧縣匪徒拜會圖劫案內逸犯提省審明
定擬恭摺

奏祈

聖鑒事竊照長寧縣匪徒謝詞封等結拜天地會糾眾
搶劫一案經臣提審明確按例議擬具

奏在案續據長寧縣將逸犯劉良老五獲案並究出縣
民胡運洪亦係同會一併弋獲稟經提省發委審辦茲
據委員南昌府知府吳清皋南昌府同知蔣啟敷說明
議擬由臬司陸元烺審轉前來臣親提研鞫緣劉良老

五胡運洪籍隸長寧縣與已獲擬辦之謝詞封等互相
認識劉良老五平日游蕩為匪素非善類胡運洪先未
為匪道光二十七年正月二十六日劉良老五聽凌成
滌等糾約與已獲之謝球生保等在逃之潘蛇羅四等
二十四人赴謝詞封家結拜闕爺會即天地會謝詞封
自為總老大開寫入會人姓名與凌成滌劉良老五等
同向神牌跪拜宰雞取血滴酒同飲約以同會中人各
以髮辮左盤為記並宣示此後老大有事呼喚不許不
至等誓語劉良老五聽受給與謝詞封錢二百文而散
是年五月間劉良老五另誘胡運洪及在逃之邱大楊
二照依前式在家拜會一次劉良老五自為老大餘俱

依齒序列是月二十九日謝詞封起意入城搶劫傳集
會衆告知情由先後起行劉良老五當邀胡運洪並邱
大等同往胡運洪等先未允許劉良老五用言嚇逼無
奈從行因先往之謝詞華被該縣營盤獲進城謝詞封
率衆追趕甫至長寧縣城邊河岸曹二箇等先行逃散
胡運洪等亦卽逃回劉良老五等各執刀械隨同謝詞
封欲行入城將謝詞華奪回被該縣把總德全放槍將
易泳盛擊斃始各畏懼逃逸經該縣稟經鎮道委員帶
兵會同該府馳往搜捕並經臣札飭該道親往督辦嗣
據先後等獲謝詞封等解省審明按擬具
奏聲明逸犯劉良老五等緝獲另結茲據等獲劉良老

五及被脇從劫之胡運洪押解來省發委南昌府等訊
供議擬由司審轉經臣提審據供前情不諱究無另犯
不法別案案無遁飾查例載陞等省不法匪徒潛謀
糾結復興天地會名目搶劫拒捕者首犯與曾經糾人
之犯俱擬斬立決如平日並無為匪僅止一時隨同入
會者俱發遣新疆酌撥種地當差等語此案劉良老五
聽從謝詞封結拜天地會入城圍劫該犯為之糾約党
羽同行並隨同奪犯與謝詞封同惡共濟自應按例問
擬劉良老五合依聞與等省不法匪徒潛謀糾結復興
天地會名目搶劫拒捕者首犯與曾經糾人之犯擬斬
立決例擬斬立決胡運洪僅止被誘入會其脇從行劫

旋卽逃回且平日並無為匪情事亦應按例問擬胡運
洪合依平日並無為匪僅止一時隨同入會者發遣新
疆酌撥種地當差例發遣新疆酌撥種地當差雖係南
贛匪徒例應加等第罪至外遣無可復加應毋庸議逸
犯潘蛇羅四邱大等勒緝獲日另結除條錄全案供招
咨部外所有審擬緣由理合恭摺具
奏伏乞

皇上聖鑒勅下法司核覆施行謹

奏道光二十七年十一月十六日奏奉

硃批刑部速議具奏欽此

吳文節公遺集卷十六

男養原謹編

奏議

撲捕臨川縣滋事棍徒摺

奏為棍徒挾讎焚搶拒捕傷兵現委文武大員前往撲捕以靖地方恭摺

奏祈

聖鑒事竊照上年冬間江西臨川縣北鄉棍徒周詳彩等藉修廟宇為名設立公局威脅通縣花戶每米一石勒令赴局繳錢一千文給予執照始准赴倉完糧該府縣會營查拏恃眾拒傷兵役臣檄委糧道朱履勳帶

省兵馳赴該縣殫歷查辦該匪徒等先已聞風逃散經該道將其公局拆毀搜獲要犯十餘名執照數十張解省委審當經臣於閱兵改期案內附片

奏明在案嗣據該府縣購覓紳士許光縉黃鍾秀等作線將首犯周詳彩弋獲押解來省訊據供認勒派花戶刊刻執照及拒捕關堂各情不諱正飭確審擬解間復據該府縣稟稱周詳彩餘黨周景幅等因挾紳士許光縉等作線擊犯之讎糾集多人於正月初十日將紳士許光縉等房屋燒燬銀錢穀石搶劫一空該署縣馬永熾得信會營督率兵役往捕十一日行抵北鄉萬年觀地方該匪徒持械四合迎拒致傷兵役該縣營令兵丁

開槍抵擊格斃匪徒十餘人匪等始各畏懼逃竄維時
天漸昏黑又因陰雨路滑未能窮追現在該匪徒等猶
糾聚党羽揚言釋放周詳彩重建公局殺死許光縉等
方肯解散復迫脇附近良民出丁出錢幫同抗官如其
不從卽先焚搶並據被害之士民紛紛稟訴等情飛稟
到臣查該匪徒等始則設局歛錢按糧私徵繼因首
犯周詳彩被紳士等作線拏獲胆敢挾讎率眾焚搶賊
逾鉅萬拒捕傷兵迫被該縣營等擊散之後猶敢聚眾
迫脇良民揚言挾制似此玩法奸民情同寇盜若不痛
加懲創良民何以安生臣當卽派撥省兵飭委臣標中
軍叅將丁麟兆並委因公在省之贛州府知府周五衡

會同管帶迅速馳赴撲捕務將首要各犯悉數就獲從嚴懲辦所有匪徒滋事現在查辦情形合先恭摺具奏伏乞

皇上聖鑒訓示謹

奏道光二十八年正月二十八日奏奉

硃批另有旨欽此

漕船應溯流迎查摺

奏為江西各幫漕船難於蕪湖關停泊候驗應請遵旨溯流迎查恭摺

奏祈

聖鑒事竊

臣

接准戶部咨議覆安徽撫

臣

王植片奏軍

船准帶土宜開單移關查驗並江西軍船請照兩湖軍
船章程到關暫停候驗一摺奏奉

上諭漕船准帶土宜原為津貼體卹起見惟例外多帶
既應查驗於未經開行之先尤宜嚴防其中途裝帶之
弊著湖廣江西各督撫轉飭各該糧道實力查驗并開
列艙口清單先期飛移各關俟糧船抵關時按單查驗
認真辦理惟江西漕船抵關時每多連樁竟遇不候查
驗藉口於限緊溜急每多夾帶著查照兩湖漕船章程
到關暫停或溯流迎查俾得該寔稽察毋誤違行總當
見船卽驗一驗卽行斷不准稍有遲延透漏以速運務
而重關稅等因欽此欽遵轉行遵照去後茲據督糧道

朱璽詳稱遵查漕船例帶土宜歷係開明貨色清單到關呈驗但未將何艙貯何土宜若干一一分晰開列奉行前因自應欽遵查辦以杜例外多帶之弊至漕船行抵蕪湖關暫停候驗一層詳細體察難以查照兩湖章程辦理緣兩湖漕船每省各止一百數十餘隻係屬先後行走江省漕船共計六百三十六隻連播遙行不准脫空蕪湖關南岸為停船候驗碼頭僅可容湖南北各自行走百餘隻之漕船不能容江西魚貫行走六百餘隻之漕船其北岸燥磯地方係著名險隘五溜迅急更難灣泊自應欽遵

諭旨溯流迎查較為妥便惟查該關從前詳明迎查之

澹港地方亦僅能容船百餘隻若前船停泊待查後船
跟蹤而未卽無堪泊之處每致不能排列候驗仍屬有
名無實茲查有安徽銅陵縣所屬之大通鎮地方碼頭
寬闊水勢平穩兼有支港可避風浪素為漕船停泊之
所距蕪湖關僅止百餘里江西幫船應請卽於此處暫
停候驗俟各幫漕船將抵該處先期飛移該關或關道
親夫或派委妥員攜帶印票會同該道督率押運廳弁
實力查驗給票放行如此辦理既可認真榷稅而漕船
亦可免疏虞等情呈請具
奏前來臣覆加體察委係實在情形且查湖北漕船九
江關道亦係於距關一百數十里之田家鎮地方迎查

歷辦有年從無貽誤蕪湖關似可照辦合無仰懇
天恩飭下安徽撫臣轉飭蕪湖關道將江西各幫漕船
在於銅陵縣所屬之大通鎮地方暫停候驗該關道務
須隨到隨驗隨即放行不得稍有遲延俾關稅漕船兩
無窒礙是否有當理合恭摺具
奏伏乞

皇上聖鑒訓示謹

奏道光二十八年二月二十二日奏奉

硃批戶部速議具奏欽此

捕獲臨川縣滋事棍徒片

再江西臨川縣棍徒周景幅等挾讎焚搶拒捕傷兵當

經臣派委文武大員帶領省兵前往撲捕一面將查辦情形恭摺具

奏在案茲據委員贛州府知府周玉衡撫標叅將丁麟兆回省稟稱該府等馳抵該縣該匪徒等先期聞風解散連日會同地方文武督帶兵役分投搜捕首犯周景幅早經遠颺已將次要之周赤沅等二十餘名拏獲訊據供認聽從放火拒捕屬寔現在良民安業地方平靜酌留兵丁數十名在彼隨同該府縣偵捕逸犯餘兵撤回隸伍等情到臣除臣仍嚴飭該府縣跟蹤偵捕要犯周景幅等悉教務獲究懲並將已獲各犯提省隸案審辦外所有地方靜謐省兵撤回隸伍情形謹先附片陳

明伏乞

聖鑒謹

奏道光二十八年二月二十二日奏奉

硃批知道了欽此

移駐通判等缺摺

奏為移駐通判等缺以資整頓並酌請改繁改簡以符定制恭摺仰祈

聖鑒事竊維除暴詰奸為安民之要務設官分職必因地以制宜臣等查得江西贛州府所屬之龍南縣民俗獷悍近年以來搶劫鬪毆捉禁勒贖之案層見迭出推原其故因該縣南鄉有太平新興大龍三堡界連廣東

連平和平南雄始與翁源及本省信豐等州縣四通八
達匪類最易潛蹤而龍南縣城僻處東北一隅相距該
三堡自八九十里至一百八九十里不等該匪類等明
知縣官下鄉不能久住每每此拏彼竄散而復聚前於
扼要之大龍堡觀音閣地方添設大龍司巡檢一員查
拏稽察奈因官職微小額設弓兵無多巡防仍難得力
查贛州府通判本在郡城後經移駐贛縣所屬之大湖
江今大湖江一帶河道平靜毋須大員彈壓應請將該
通判改駐龍南縣觀音閣地方分防龍南信豐兩縣並
請於贛標後營派撥千總一員兵丁八十名與該通判
一同防守凡龍南縣屬之太平等堡暨信豐縣屬距城

遠而距該處近之鎮南等堡遇有命盜搶奪案件該縣等不克分身准該通判會營勘驗緝拏送縣究辦一切詞訟亦准就近審理俾小民得以隨時控究匪賴不致橫行如遇太平鎮南等堡有疏防失察等事即將該通判作為捕官開叅其餘概照不同城捕盜廳負例叅處移駐千總卽作為該處專防以本汛武弁為協防至觀音閣既有通判並千總駐紮所有大龍司巡檢應卽移至該通判原駐之大湖江地方巡防河匪分別換給贛州府分防觀音閣等處督捕通判關防及贛縣大湖司巡檢印信以昭信守大湖江本有通判舊署可卽改為巡檢衙署凡巡檢廩俸弓兵五食等項俱仍舊貫毋庸

另議觀音閣應建通判于總衙署並增築城堡及搭蓋
兵房公廨約估需銀八九千兩請由臣吳文鎔督飭該
道府等捐廉興辦毋庸請動

國帑該通判廉俸書役工食等項照原額由坐編之縣
支給相驗命案需用件作刑書卽由龍南信豐二縣撥
給應役亦毋庸另議添設惟是贛州府通判係屬簡缺
今議移駐要地必須幹練有為熟悉情形之員方足以
資治理應請改為繁疲難兼三要缺由外揀員調補以
重職守而簡缺改繁例應於繁缺中酌改一缺為簡以
資抵補查有南康府屬之都昌縣原定繁疲難兼三要
缺近來獄訟稀少可以改為疲難二字中缺一缺以符定制

抑臣等更有請者龍南長寧二縣汛兵係贛鎮標後營中營所屬相距汎地或三百餘里或四百餘里間有會營調兵之事往返非十餘日不可易失機宜查龍南縣離橫岡營八十里請將該縣額兵並現議移駐弁兵統隸橫岡營都司管轄長寧縣離羊角營八十里請將該縣額兵撥隸羊角營都司管轄如此一轉移間緩急更為足恃而弁兵並不增額於營制亦無窒礙臣等為整頓地方起見往返函商意見相同茲據藩臬兩司轉據該管道府具詳請

奏前來謹合詞恭摺具

奏伏乞

單上聖鑒訓示

勅部覈覆施行謹

奏道光二十八年三月十七日奏奉

硃批該部議奏欽此